

**KJ Sedia Debat Dengan PAS Isu Siapa Layak Digelar Pejuang Merdeka
Bernama
5 September 2011**

KUALA LUMPUR, 5 Sept (Bernama) -- Ketua Pemuda Umno, Khairy Jamaluddin menyahut cabaran PAS untuk berdebat secara terbuka mengenai isu siapa yang layak digelar pejuang kemerdekaan negara.

Khairy yang juga Pengerusi Pemuda Barisan Nasional (BN) itu berkata, beliau telah menerima jemputan yang dipanjangkan oleh kerajaan negeri Kelantan untuk berdebat dengan Timbalan Presiden PAS, Mohamad Sabu yang mencetuskan kontroversi tersebut.

"Saya dah terima jemputan...untuk berdebat dengan Mat Sabu di Balai Islam Lundang Kota Baharu.

"Saya akan berada di sana," katanya menerusi mesej Twitter semalam dan berkata beliau tidak gentar walaupun terpaksa bertandang ke kubu kuat parti itu.

Khairy berkata, walaupun di gelanggang lawan, sama ada Mohamad Sabu atau Datuk Husam Musa (Naib Presiden PAS) beliau tetap akan hadir.

"Masa lawan Husam dulu tiga ribu penyokong PAS dok sorak. Its OK.

"Tak payah cari gelanggang neutral," katanya.

Semalam, Ketua Penerangan PAS, Datuk Tuan Ibrahim Tuan Man mengsyorkan debat PAS-Umno berhubung kontroversi tragedi Bukit Kepong dan isu siapa pejuang kemerdekaan negara bagi membolehkan rakyat sendiri membuat penilaian.

---BERNAMA

Hakcipta © 2011 BERNAMA

Source:<http://www.bernama.com/bernama/v5/bm/newsindex.php?id=611539>